

國

子

監

志

國子監志卷二十二

辟雍志四

建置

乾隆四十八年。

諭內閣。稽古國學之制。天子曰辟雍。所以行禮樂。宣德  
化。昭文明而流教澤。典至鉅也。朕此次釋奠禮成。念  
國學為人文薈萃之地。規制宜隆。而辟雍之立。自元  
明以來。典尚闕如。自應增建以臻美備。著派禮部尚  
書德保。工部尚書兼管國子監事務劉墉。侍郎德成。

敬謹前往閱視。度地鳩工。諏吉興建。落成之日。朕將舉行臨雍典禮。以昭久道化成之盛。尋德保等相度地勢。定於彝倫堂之南營建。繪圖進呈。

諭內閣。據德保等將辟雍圖式進呈。自應仿照禮經舊制。度地營建。即著德保劉墉德成總司其事。敬謹承辦。以光盛典。

又德保等奏

寶座屏風圖式。得

旨允行。

又奏

辟雍殿暨水池等項工程做法銀數

諭內閣。交總理工程戶部尚書和珅另定做法。估核錢糧。尋和珅覆勘奏將原估鑽金柱四撤去。用抹角架海梁之法。較前議減費四千四百有奇。規模更為宏敞周密。

詔從之。

又

諭內閣。添派工部尚書金簡。辦理辟雍工程。

臣二、具、示、  
建置

又金簡等奏建牌樓

諭內閣著照大西天琉璃牌樓式樣建造琉璃牌樓一座

又奏添建碑亭鐘鼓亭

詔從之

高宗純皇帝御製國學新建辟雍園水工成碑記

名者實之賓。實者名之主。為學之方。應務其實。以漸循其名。不可炫其名。以致亡其實。興學之源。綦要於國學。國學者。天子之學也。天子之學曰辟雍。諸侯之

學曰泮水。北京之國學。自元歷明以至本朝。蓋五百  
餘年矣。有國學而無辟雍。名實或不相稱焉。雖有建  
議請復。以乏水而格部議。至今未復。癸卯春。始有復  
建之諭。甲辰冬。乃觀新工之竣。將於乙巳仲春。行釋  
奠禮。遂臨雍以落成焉。夫北京為天下都會。教化所  
先也。大典缺如。非所以崇儒重道。古與稽而今與居  
也。雖乏水。然有不改之井。汲以綆而用之。無窮亦在  
人為之而已。於是石之鱗次。見圓斯池。水之鏡澄。見  
明斯漪。殿之據中。見隆其棟。橋之通行。見接其基。上

庠下庠。雖難考二典之制。而東序西序。總不出三代之規。則是工之舉也。又予知過論所謂於不可已者。仍酌行之之意。而物給價。工給值。原非勞民動衆之為。若夫三老五更之說。予以為括於養老化俗之儀。而非天子臨雍所必應並行而不遺者。蓋弗見於詩書。乃特出杜佑通典之私耳。且予向有三老五更之說。已明闢其謬。茲不複綴乎詞。雖然。予更有懼於是舉者。夫是舉豈非復古興學之懿。有何懼。而予懼之者。恐後之人執予復古之說。於一切衣冠典禮。皆欲

效漢人之制。則予為得罪祖宗之人。匪教伊虐。甚慮不宜也。予之子孫臣庶。體予此心。於可復古者。復之。其不可復者。斷不可泥古而復之。夫徒慕復古之虛名。而致有亡。

祖宗之實失。非下愚而何。予不為也。予敬以是告子孫。以保我皇清萬年之基也。

仁宗睿皇帝御製擬新建辟雍碑記

太學之有辟雍。古之制也。國家定鼎燕京。立太學以教士化民。而於建辟雍有未遑焉。茲承百年熙和之



會正興禮樂以牖民迪俗之時。自邦畿以及直省郡邑。關表海澨。皆有學宮。太學在京師。萬民所景仰。其制不可不備也。參古準今。胥不可緩。記曰。天子曰辟雍。夫三代以下。治不及古。不先圖治安民而遑遑焉興學崇文者有之。亦有泥古以求治。失之遠矣。今則重熙累洽。同軌同文。教之以禮義。化之以詩書。建辟雍以象天運。敷教化於流水之源。明其制度。用古而非泥於古也。稽古之道。必明本而達用。知古今之不同。則敦風俗。正人心。紀綱振而舉錯宜。用古以治。

今惟酌其理而已。辟雍之建。所以紀同軌同文之盛。昭示來學。非徒崇古之迹也。若泥於是。則井田封建。胥可行乎。更不待言矣。語曰。正其本。萬事理。差之豪釐。謬以千里。以是為政。以是為教。爰勒石成均。以誌歲月。

國子監志卷二十三

辟雍志五

視學

順治九年。秋九月。辛卯。

世祖章皇帝視學。

親詣

先師廟釋奠後。

御藝倫堂。

命祭酒臣固爾嘉渾。臣李爽棠。進講四書。司業臣傳達。

禮臣馮杰進講尚書禮成翼日衍聖公臣孔興  
燮祭酒臣固爾嘉渾等率五經博士五氏後裔  
及國子監官生表謝

命頒勅諭勉勵師生

恭載卷首文

賜衍聖公內院翰林官國子監祭酒司業等官五經博  
士五氏後裔及禮部太常光祿鴻臚三寺執事  
羣臣宴於禮部越日

賜衍聖公貂冠一朝服一祭酒司業錦緣領袖紵絲袍  
服各一監丞五經博士筆帖式孔氏顏曾孟仲

四氏後裔。紵絲袍服各一。助教大堂諸生。及各學教習師生。白金有差。准觀禮五氏裔十五人入監肄業。廣國子監鄉試中額十五名。

謹案是年。禮部奏准。先期行取衍聖公五經博士。及孔顏曾孟仲五氏後裔。陪祀觀禮。

康熙八年夏四月辛丑。

聖祖仁皇帝視學。

親詣

先師廟釋奠後。

御藝倫堂

命祭酒臣賈祿臣宋德宜進講中庸司業臣博濟臣陳廷敬進講尚書既畢

聖祖親授經義翼日行聖公臣孔毓圻祭酒臣賈祿等率五經博士五氏後裔及國子監官生表謝

命頒勅諭勉勵師生

恭載卷首

賜羣臣宴於禮部

賜衍聖公冠服國子監官及五經博士等袍服諸生白金有差准觀禮五氏裔十五人入監肄業廣國

子監鄉試中額八名。

雍正二年。

諭禮部。帝王臨雍大典。所以尊師重道。為教化之本。朕覽史冊所載。多稱幸學。近日奏章儀注。相沿未改。此臣下尊君之詞。朕心有所未安。今釋奠伊邇。朕將親詣行禮。嗣後一應奏章儀注。稱幸非宜。應改為詣字。以申崇敬。

是年春三月乙亥朔。

世宗憲皇帝視學。

親詣

先師廟釋奠後

御彝倫堂

命祭酒臣塞楞額臣王傳進講大學司業臣博禮臣彭

維新進講尚書既畢

世宗親授經義

特諭增復

先師廟

崇聖祠附饗賢儒增置先賢先儒裔五經博士復



諭廣直省入學額數。其人文最盛州縣小學改中學。中學改大學。大學如府學。又

命監臣及直省學政錄科時。察實能貫通五經諸生。仍聽以五經應試。各氏後裔送監讀書者十五人。廣國子監鄉試中額十八名。是日。值祀歷代帝王廟齋期。

駕還宮不作樂。翼日。衍聖公次子五經博士臣孔繼溥。祭酒臣塞楞額等。率五經博士各氏後裔及國子監官生表謝。

命頒勅諭勉勵師生

恭載卷首

賜羣臣宴於禮部又

賜衍聖公冠服國子監官及五經博士等袍服諸生白

金有差觀禮進士九十五人舉人二百七十五

人廕貢監生八旗官學生千六百八十五人竝

蒙

恩賚

世宗憲皇帝御製詣太學詩

禮樂牖民資大化國家造士在斯文臨雍觀禮崇儒

初視學論經養俊殷。濟濟橋門龍旆繞。雍雍璧水鳳毛紛。千官咸慶文明盛。還佇同風率土訢。

謹案是年。禮部行取衍聖公臣孔傳鐸有疾。奏以次子候襲五經博士。臣孔繼溥敬代。

世宗憲皇帝命班次視衍聖公。惟所服仍其官。又命增閔氏後裔陪祀觀禮。

乾隆三年春三月甲寅。

高宗純皇帝視學。

親詣

先師廟釋奠後

御彝倫堂

命祭酒臣國連。臣李鳳翥進講中庸第一章。司業臣塞爾登。署司業贊善臣李文銳進講尚書堯典。既畢。

高宗親講經蘊。諸王公卿以下暨多士。圍伏聽講。翼日。行聖公。臣孔廣森。領監事尚書臣孫嘉淦等。率五經博士。各氏後裔。及國子監官生表謝。

命頒勅諭。勉勵師生。

恭載卷首

文

賜羣臣宴於禮部

賜衍聖公

御製樂善堂文集一部。墨二匱。貂四。貂冠一。朝服一。領

監事尚書祭酒司業等各錦緣領袖紵絲袍服一。  
一。聖裔五人各

文集一部。墨二匱。紵絲袍服一。貂三。五經博士各

文集一部。墨二匱。紵絲袍服一。貂二。國子監官及孔顏

諸氏生員各紵絲袍服一。

賜觀禮五氏後裔九十二人。進士舉人貢監諸生三千

二百八十五人。諸學教習師生九百二十四人。白金有差。准十三氏後裔三十一人入監肄業。廣國子監鄉試中額十八名。

高宗純皇帝御製臨雍講義

中庸首章。天命之謂性。率性之謂道。是本一貫之理也。亦猶無極而太極。太極而陰陽。陰陽本太極。太極本無極也。蓋道本乎性。性本乎天。至云脩道之謂教。則有人力之施而已。非道之本原矣。故論其本原。無所謂離與合也。至有道之可名。於是乎須臾不可離。

且戒之曰可離非道。而戒懼慎獨之功。亦莫不因脩道而起。不知喜怒哀樂之未發。即天命也。謂之中。卽性也。發而中節。卽率性也。謂之和。卽道也。豈非天下之大本達道乎。故曰致中和。天地位焉。萬物育焉。若曰天地自位。萬物自育而已。儻視喜怒哀樂未發以下為慎獨工夫。殊失于思子之本旨矣。

尚書首節堯典紀堯之德。以欽始。以欽終。欽明本堯之德。至二女之嬪虞。亦教之曰欽哉。則聖人之心。無時無事之不主敬可知矣。夫人心惟危。敬則不至於

危道心惟微敬則不患其微以至精一執中舍敬其  
何以為功耶是故主敬為至要亦惟主敬為最難帝  
堯之聖猶兢業之弗遑況在常人豈可須臾去敬以  
自外於聖人之教哉

謹案是年增冉卜言額孫端木五經博士及諸  
氏後裔各二人又增元聖後裔東野五經博士  
竝其族二人赴京陪祀又二年部臣議定觀禮  
人員數目至聖裔二十人曲阜十二人衢州八  
人四配裔八人十哲裔四人



○  
視學儀注

乾隆三年奏定

凡

視學之日。

皇帝禮服乘輿

詣學。

儀與丁祭日親詣同

法駕鹵簿前導。引扈如常儀。王公百官咸集國子監。

祭酒司業率所屬官暨進士舉人朝服。諸生公

服。跪迎於成賢街道右。

皇帝至廟門外降輿入太常寺卿二人恭導

聖駕詣

大成殿釋奠於

先師孔子

上香奠帛爵一獻樂三奏不讀祝

禮畢出

大成門大次更衣服王以下咸更衣服王公序

立於大次之南各官均先詣彝倫堂庭中按朝

班東西序立衍聖公在東班之首五經博士各

氏後裔在班末均東西面北上記注官四人立

西階下東面糾儀給事中御史各二人鴻臚寺

鳴贊二人。立東西階下。均東西面北上。宣制官一人。立東檐下西面。祭酒司業率所屬官。暨進士舉人。肄業諸生。序立太學門內東西面南上。禮部尚書奏請。

行講學禮。太學鳴鐘鼓。

皇帝出大次。至門外乘輿。導迎樂作。由太學中門入。王公等隨入。祭酒以下跪候。

駕過輿。咸隨入。

皇帝至彝倫堂降輿。

御講幄

升座。記注官升西階入立堂內右楹之西。糾儀官升東西階立東西檐下第三柱。鳴贊升立第二柱。王公立階上各官立階下均東西面。鳴贊贊排班。衍聖公率五經博士各氏後裔祭酒司業率所屬官及進士舉人諸生咸就拜位北面立。班齊贊進衆進贊跪叩興衆行三跪九叩禮畢。賜王公暨衍聖公大學士九卿坐。鴻臚寺官引由左右門入堂內咸跪行一叩禮坐。翰詹四品以下

官。國子監官。六堂各學師儒。五經博士。各氏後裔。進士舉人肄業諸生。皆立東西階下。圓堂下聽講。鳴贊贊進講。祭酒二人由左門入。司業二人由右門入。均北面立。贊舉案。執事官舉

御案至

御座前。

賜進講官坐。祭酒就東案。西面。司業就西案。東面。各行一叩禮坐。祭酒二人以次講。四子書。司業講經亦如之。講畢。贊舉案。執事官舉

御案置原位。王公以下起立。祭酒司業出率所屬官。  
暨進士舉人諸生就拜位。北面立。禮部尚書奏  
傳

制。鳴贊贊有

制。祭酒以下皆跪。宣

制。官進至中門左。宣

制曰。聖人之道。如日中天。講究服膺。用資治理。爾諸  
生其勉之。宣訖。贊叩興。祭酒率衆行三跪九叩  
禮。先退至成賢街恭候。

賜王公大臣茶。跪受坐飲。各行一叩禮畢。由左右門出。就階下序立。禮部尚書奏禮成。

駕興。陞輿出太學門。導迎樂作。祭酒以下跪送如初迎儀。

皇帝還宮。

○各衙門承辦

視學事宜

凡恭遇

皇帝視學。工部設大次於

大成門東又恭設

黃幄

御座於彝倫堂正中。鴻臚寺於

御座之前稍東。恭設

御案。南之東設祭酒講書案。南之西設司業講書案。  
內閣先期恭擬經書題進呈

欽定。祭酒撰四書講章。司業撰五經講章。均繕清漢  
文進呈

御覽。是日陳設



講案。王公百官咸集國子監。其觀禮之五經博士各氏後裔。以衍聖公領之。守部進士。以監丞領之。舉人以博士領之。六堂肄業生。以六堂助教學正學錄領之。八旗官學生。以八學助教教習領之。各學學生。以各學副管教長教習領之。均先期到監演習禮儀。

○國子監承辦

視學事宜

先期移文禮部查取

視學典禮工部修葺

先師廟殿廡及彝倫堂以下廳堂等處直省取官廩生○思拔副歲優貢生援例貢監生吏部取守部進士舉人宗學

咸安宮景山等學取副管教長教習學生又准禮部劄送五經博士各氏後裔均到監觀禮其守部進士舉人迎

駕時穿朝服觀禮時更采服有職之各氏後裔并各副管教長教習及有職之貢監生並穿補服其

無職之各氏後裔。及貢監生。穿藍鑲青衫披肩。  
金雀高頂。廕監生世職學生。用所襲品級服色。  
官學生穿青鑲藍衫披肩。銀雀高頂。均先期榜  
示。屆期移文工部。恭設大次。竝

黃幄

御座。鴻臚寺設

御案。及祭酒等講經書案。清漢文講章。由博士擇六  
堂肄業生。八旗官學生善書者。繕寫觀禮職名。  
由典籍查收入冊。

國子監志卷二十四

辟雍志六

臨雍

乾隆四十九年。

諭內閣稽古明倫設教典重學宮國學為首善之區橋  
門觀聽規制尤宜隆備前命尚書劉墉德保金簡侍  
郎德成鳩工庀材興建辟雍現在已屆落成朕於明  
年仲春

釋奠成禮即臨雍講學所有應行典禮著各該衙門

國子監志

卷二十四

附錄

詳議具奏

乾隆五十年春二月丁亥

高宗純皇帝肇建辟雍

臨雍講學

親詣

先師廟釋奠後

御彝倫堂更衣傳膳

特賜監臣克食

臨辟雍殿

特命大學士伯臣伍彌泰兼管監事臣蔡新進講四書命祭酒臣覺羅吉善臣鄒奕孝進講周易既畢

高宗特製御論

宣示義經王公大臣以下暨多士等園橋聽講禮成特賜進講官茶

賜王公衍聖公大學士九卿詹事茶如制次日衍聖公臣孔憲培兼管監事大學士臣蔡新等率官生表謝國子監官生恭進詩冊

賜羣臣宴於禮部

賞衍聖公

御論冠服徽墨貂四聖賢各氏後裔

御論緞疋徽墨貂二進講大學士暨祭酒司業緞疋各

二監丞助教等官緞疋各一視定制有加肄業

暨觀禮諸生三千八十八人。

賜白金如例復以

臨雍日遇雨。

屢念羣臣多士。衣履沾溼。

特命賜各官紀錄一次。

賜聖賢後裔五絲緞一百二十二卷。觀禮諸生綢三千八十八疋。朝鮮使臣隨班觀禮。

恩賜大緞二疋。八絲緞二疋。廣丙午科國子監鄉試中額十五名。凡陪祀觀禮之職官。咨部

恩敘。其貢生准與應考職銜。武生俊秀奉祀生三項。准作監生。送監讀書者三十七人。又奏定至聖裔陪祀曲阜五人。衢州二人。元聖裔東野氏姬氏各二人。有子裔二人。由山東肥城縣五經博士帶領。朱子裔二人。於婺源建安分派。是年臣監



恭刊

御論裝潢一百五十本進呈備

賞并京外通行頒發

高宗純皇帝御製為人君止於仁為人臣止於敬為人  
子止於孝為人父止於慈與國人交止於信論  
御製天行健君子以自彊不息論

謹案此次

臨雍御論二章

高宗純皇帝特命臣監恭刊

頒發中外。允宜敬載本志。以光

盛典。惟查乾隆六十年。石刻

御製說經文於彝倫堂。復

親灑宸翰。壽諸貞珉。爰恭載金石志。用垂久遠。謹識。

高宗純皇帝御製上丁

釋奠後臨新建辟雍講學得近體四首

國學由來教化先。北京建五百餘年。空傳中統廟修

矣。

按元史稱太祖平燕京。以金樞密院為宣聖廟。又世祖紀中統三年修宣聖廟。此皆言彼時南城國

子學。蓋元太祖初定燕京時所建也。至選舉志稱至元二十四年遷都北城。立國子學於國城之東。又世

祖紀二十四年閏二月設國子監乃今城東國子監之權輿也是以己丑年曾製重修文廟碑記云國學始於元太祖置宣聖廟於燕京乃指燕京初設國子學之始而言茲城東之文廟國子監則世祖至元二十四年遷都北城所立而非中統所修矣向來紀載重沓每自相牴牾因為訂正明晰附識於此獨惜辟雍典闕然酌古準今圖以躬穿池引井壁成圓崇儒重道心雖疊懼亦在茲記語宣古制天子之學曰泮宮北京國學自元應明以至本朝五百餘年有國學而無辟雍名實不稱雖有建議請復以乏水而格部議昨癸卯春始命酌古準今穿池引井新建園水復親製碑文以復古而不可泥古諄切語誠詳見辟雍碑記文。

放勲巍蕩未言學教胄命夔始有虞夏序殷宗因遞

述文豐武鎬宜相殊。園橋莫作徒觀者。廷獻應為有

用儒。却憶永平稱億萬。

後漢紀稱明帝永平二年上始率羣臣恭養三老五更於

辟雍。饗射禮畢。帝正坐自講。諸儒執經問難於前。冠帶搢紳之人。圜橋門而觀聽者。蓋億萬計。云云。所記未免失實。臨雍盛典觀聽雖多。然搢紳冠帶何至億萬人之多。且園橋之間豈能容而人多擁擠亦必觀聽有所不及。史傳之誣。往往類是。雖云善善畧鄰誣。

三五昔經論說詳。謂他杜撰失荒唐。

三老五更之說不見詩書。惟禮

記出漢儒非孔子之言。左傳始有三老凍餒之文。註疏者紛紛不一。而蔡邕獨斷遂有父事兄事之說。白虎通直以為老更各一人。且曰父一而已。不宜有三。其謬更甚。杜佑通典亦宗其說。真成杜撰矣。向嘗著說聞之。詳見三老五更。祇宜養老示恩渥。難竝臨雍說。今命刻於辟雍碑陰。

贊禮煌韓愈不甘弟子列蔡新或備伯兄行韓愈答呂廕山

人書謂世無孔子不當在弟子之列其見甚高語亦

正若今之羣臣孰可當老更之席者獨大學士蔡新

長於予四歲或可居兄事之列然恐其處其驚懼謝

局起弗敢當舉王導對晉元帝之語耳

無當去聲王導稱曾喻太陽晉書王導傳帝登尊號百官陪列命導升御牀導固

辭曰若太陽下同萬物

蒼生何由仰照帝乃止

祭母欲數上丁逢

釋奠禮成臨辟雍舉事率因待時節北京國子監自元迄今五百餘

年而辟雍園水之制未備癸卯春始命興建甲辰冬工竣此誠舉大事者必有時節之待也

寧渠去聲在儀容五倫知止須勤勗一已自強切戒慵

是日講章題。大學為人君止於仁為人臣止於敬為人子止於孝為人父止於慈與國人交止於信。易經天行健君子文質彬彬衆和樂重熙茂對志滋恭以自彊不息。

謹案

高宗純皇帝御製詩四首恭刊

御筆於

辟雍殿五峯屏中惟

御注未詳併遵

御製集敬錄如右云

仁宗睿皇帝御製恭和

御製乙巳上丁

釋奠後臨新建辟雍講學得近體四首元韻

成均首善

帝京先盛典新開五十年。教育臣民瞻煥若。規模寰宇  
仰彬然。辟雍初建制始備。靈沼平臨水漾圓。復古道  
隆非泥古。

聖謨丕顯共昭宣。

精一心傳咨教胄。

君師道合繼唐虞。學庠於此探津逮。禮制由來總散殊。

化俗明倫先造士。執經稽古首崇儒。永平往事何堪  
調。億萬人觀史失誣。

庠序披圖古制詳。殿基巍建據中唐。週迴鏡水

恩波漾。端拱明堂

聖典煌。經史已瞻頒鳳闕。老更奚必備駕行。文筵開處  
羣賢蔚。講席高輝義答陽。

曠代工成紀闕逢。仲春七日

詣三雍。

緝熙止艮



心無逸

行健乘乾

德有容聲振綱維羣鼓舞承宣政化敢疎慵右文重道  
儀型協喜起

堂廉益敬恭

同日

高宗純皇帝御製雪詩

命祭酒恭和

敬以臨雍祀

上丁。夜霏稷霤曉無停。春雲愷澤凝春雪。六出文華  
燦六經。自幸麥莠發苗穎。敢云俎豆假香馨。微憐人  
士溼衣履。斂

福恩應錫在廷。

恭和

高宗純皇帝御製雪元韻

臣覺羅吉善

儀隆

典茂日諏丁。瑞雪輝迎

玉輦停。士慶逢年

天錫瑞。

教先化雨

聖傳經。農田澤溥。詩書澤。

帝德馨。兼黍稷馨。

有喜顏。欣瞻咫尺。

恩光稠疊

賁彤廷。

臣鄒奕孝

南極呈祥始見丁。春陰初散曉雲停。

崇儒此日欽

傳道映雪當年媿執經。壁水漸融三尺暖。青衫偏惹六  
花馨。普天鼓舞歌時玉。猶

軫韋絃立

紫廷。

又

諭朕此次

釋奠禮成。臨雍講學。園橋觀聽。文教覃敷。實為高皇盛  
典。且自冬春以來。雨雪尚未霑足。朕心焦灼。茲當俎

豆馨聞。恰值春膏霑霈。深為欣慶。第念隨從執事諸臣。及觀禮多士。衣履霑溼。允宜廣錫恩施。所有執事扈從之王公大臣。衍聖公。並文武官員。俱著紀錄一次。其觀禮諸生。及至聖各氏後裔。並著查明分別加恩賞賚。

嘉慶二年

敕諭。向逢皇帝臨御初年。舉行耕耤臨雍大閱諸典禮。臣工等每多獻詩賦。以紀昇平盛典。上年皇帝紀元初載。即舉行躬耕之典。諸臣未即製冊呈進。自因其

時軍務未竣。朕籌筆勤勞。皇帝日昃訓政。同深盼捷。是以諸臣仰體宵旰焦勞。於循例頌揚之文。未敢率行呈進。所見自屬正理。但湖南苗匪。早經平定。黔楚匪黨。疊經官兵勦捕。勢已潰散。指日首逆就擒。即可撤兵藏事。因思明歲仲春。皇帝應舉臨雍視學之典。冬間即應舉行大閱。所有一切事宜。著各該衙門照例豫備。我國家慶洽昇平。文修武備。疊舉鴻儀。光昭盛軌。諸臣雍容揄揚。抒誠臚頌。維時自當照例進呈詩賦。用彰黼黻太平之盛。

嘉慶三年春二月丁酉

仁宗睿皇帝恭奉

高宗純皇帝敕旨

臨雍講學

親詣

先師廟釋奠後

御辟雍殿

命大學士臣蘇凌阿兼管監事臣劉墉進講四書祭酒

臣法式善臣胡長齡進講周易既畢

仁宗宣講御論。王公大臣以下。暨多士等。圍橋觀聽。禮成。

賜進講各官。並王公衍聖公大臣茶如制。翼日。衍聖公臣孔慶鎔。兼管監事大學士臣劉墉等。率官生表謝。國子監官生恭進詩冊。

賜羣臣宴於禮部。

賜衍聖公冠服。緞足。徽墨貂四。聖賢後裔五經博士八絲緞二。徽墨貂二。進講大學士八絲緞四。祭酒三。司業二。監丞助教等官五絲緞各一。觀禮諸



生二千八百八十五人

賜白金如例。陪祀各氏後裔。送監讀書者三十九人。觀禮各氏後裔。咨部。

恩敘。廣國子監鄉試中額十五名。臣監恭刊。

御論。頒發與乾隆五十年同。

仁宗睿皇帝御製大學之道在明明德。在親民。在止於至善論。

大學一書。首言明德新民。而必皆止於至善。此道統之淵源。而內聖外王之綱領也。夫大人為學之道。在

明吾本來之德。德賦於天。稟於性。具於心。至精至醇。廣蘊圓神。方智之體。故謂之明德。然此德者。人人之所同得。非一己之所私有。故必致力以明之。使無或為外物所蔽。既明矣。則思推而溥之。俾溥海生民。皆有以復其本來所同得者。咸與臻於大同之治。斯明德之效。見之於新民矣。欲明其德。必極於合天之心。欲新其民。必極於凝天之命。然後為能止於至善焉。人主照臨天下。己德無不明。則民德無不新。上下皆能止至善。彌綸範圍之能事畢矣。此脩齊治平之全

功。為學之道。孰大於此。為君者。誠身體力行。於以希堯舜於變之風。其庶幾乎。

仁宗睿皇帝御製君子以教思无穷。容保民无疆。論大易著象。臨卦之義。尤切於人君之道焉。蓋人君之道。一仁而已矣。仁之心。教之思也。心之本乎仁者。肫然不已。故思之著乎教者。油然而无穷。申之以孝弟。輔之以德禮。振之以政刑。欲民為善之心。無所不盡。與兌澤同其深矣。始之於邦畿。達之於侯甸。極之於要荒。欲民從風之化。無所不屆。與坤德同其廣矣。作君

卽所以作師。非異人任也。而尤在養賢以及萬民。感  
化育之恩。戴照臨之德。斯教思之无窮者達。而容保  
之无疆者遂矣。此先聖著象之本意。有知臨之責者  
可不勉諸。

高宗純皇帝御製命嗣皇帝臨雍講學禮成書事

三春匪速亦非久。嗣帝臨雍巨典昭。可識崇文在敦  
實。由來切近以推遙。親民明德至善止。教思聲无窮  
容保標。嗣皇帝受寶。今屋三年。昨歲預降敕旨。照乾  
隆三年臨雍之例。於今春舉行此典。以大學  
篇首。明德親民止至善一節。及易經臨卦象辭。君子  
以教思无窮。容保民无疆二句命題。嗣皇帝製論呈

賈。屆期循照向儀。於釋奠後。臨雍宣講。禮文賅備。而予以望九之年。而命嗣皇帝行茲巨典。於訓文之中。即寓訓政之意。尤為千古美談。熟讀幼齡。茲耄耄。訓文訓政。豈殊遠。

仁宗睿皇帝御製辟雍經筵

臨雍

示訓曾隨侍。乾隆乙巳肇建辟雍。二月上丁。命予隨侍。觀禮。講

學今叨

聖澤洋洋。明德新民。止至善。知臨容保樂無疆。是日進

大學之道。在明明德。在親民。在止於至善。易經君子以教思無窮。容保民無疆。

右文圖治經書括。

製記探源名實彰。

恭讀水工成碑記。

聖製國學新建辟雍園為學之方。應務其實。以

新循其名。不可炫其名以致亡其實。於可復古者復之。於不可復古者。斷不可復。

聖謨洋洋明切

垂訓億萬禩所當遵循也。

壽寓作人昭雅化。敬承

父子寸衷藹。

八年頒

勅諭一道。勉勵師生。

恭載卷首。文

嘉慶二十五年。

諭內閣。朕自嘉慶三年。奉

皇考高宗純皇帝勅旨臨雍講學。一時園橋觀聽稱盛典焉。迄今已閱二十餘年。未經舉行。明年仲春上丁。朕親祭

先師。再舉臨雍講學之禮。一應儀節悉照嘉慶三年之例。所有應行豫備事宜。著各該衙門先期敬謹辦理。

道光二年

諭內閣。朕於明年上丁親詣

先師孔子廟行禮。其臨雍釋奠之典。著於二月十三

日舉行。所有應行事宜。著該衙門敬謹豫備。

道光三年春二月癸丑。

皇上臨雍講學。

親詣

先師廟釋奠後。

御辟雍殿。

命大學士臣曹振鏞臣長齡進講四書。祭酒臣宗室

鐵麟臣彭邦彥進講虞書。既畢。

上宣示御論。王公大臣以下。暨多士等圍橋伏聽。禮



成。

賜茶如例。

上復頒勅諭訓勵師生。

載卷首。文恭

次日行聖公臣孔

慶鎔率五經博士各氏後裔兼管監事尚書臣

汪廷珍等率官生表謝。

賜羣臣宴於禮部。

賜衍聖公冠服大緞四墨四貂四聖賢後裔五經博

士八絲緞二墨二貂二進講大學士八絲緞四

兼管監事暨祭酒三司業二監丞助教等官五

絲緞各一。觀禮諸生三千三百二十八人。白金如例。陪祀各氏後裔。送監讀書者四十人。觀禮各氏後裔。咨部。

恩敘。廣乙酉科國子監鄉試中額十五名。臣監恭刊御論。

特命增刻年月。頒發中外。與嘉慶三年同。

皇上御製欲脩其身者先正其心。欲正其心者先誠其意論。

聖人垂訓後世。齊家治國平天下。胥本於一身。身

也者。顯揚垂裕表率之則也。有明德新民之責者。豈可忽哉。夫脩身有道。不事外求。心為身之主宰。意乃心之發端。其理本屬於一貫。其次第則有不可紊者。人君以一身上承堯舜禹湯之緒。下慰億兆蒸黎之望。萬幾至隨。一心應之。無偏無倚。始足以昭感化。然志壹則動氣。氣壹則動志。此皆意未能誠耳。意既未誠。欲心之正難。欲身之脩尤難。必也敬以直內。虛以應物。去私克己。復見天心。無一息或懈。無一念或弛。持之以謹慎。養之以和平。純

一不已。渣滓不留。意與心無二致。而後綏猷建極。措正施行。正朝廷以正百官。正百官以正萬民。未嘗以脩身示天下。而吾身之脩。即莫不共揭於天下。所謂形端表正。動罔不宜。將見上行下效。咸有一德。治理蒸蒸日上。由是推而至於致知格物。而大學之功全矣。

皇上御製惟精惟一允執厥中論

古聖人乘乾御宇。莫不以治平為急務。而先聖後聖。其揆則一。所謂揆者。傳心之要也。唐虞之世。堯

以執中傳之舜。舜推廣堯意曰。惟精曰惟一。以授禹。後世帝王咸以為準則焉。蓋存心出治之旨。大率不出民心道心。民心惟甚危險。道心惟甚幽微。危則易撓而難於安之。微則易晦而難於明之。故不得不慎。夫擇守也。夫使擇之而不精。則理與欲相乘而鄰於憧擾。守之而不一。則理與欲相雜而迫於紛繁。人君端拱於上。執兩用中。誠非易易。公其心以與天下萬物相見。誠知人心為萬慮之本。道心為衆道之本。惟精始免於混淆。而萬慮可安。

焉。惟一始歸於簡易。而衆道可擴焉。自人心而收之。孰非道心。自道心而擴之。孰非中道。執此以往。存之宥密。措之事功。萬化萬變之來。運之一心。無過不及之弊。化愈神而效愈速。德益茂而道益彰。敷錫庶民。時雍於變。要在為君者以此心默貫乎古聖之心耳。

皇上御製辟雍經筵禮成述志

視學重登

夫子堂大昕敬拜

聖謨

我朝

皇祖肇建辟雍

列聖崇儒重道

超邁往代親臨講學

皇考

嗣位之初

率循前典予繼承

丕緒猷

紹

心傳

爰於三年仲春上丁釋奠

越六日

癸丑

臨雍講學

浹日之內再謁

身心克己探原本

宮牆

仰止

景行寸衷倍切

身心克己探原本

精一持中

帝王

是日宣講四書欲脩其身者先正其心欲正其心者先誠其意

書經惟精惟一

允執厥中雅俗時厘歸至善賢才渴望立無方

昌明黌序宣經義思道尊

師敢不獲

講學之禮所以闡經義育賢才端教術也方今文治昌明聿脩茂典園橋觀聽三千

四百餘人

爾多士砥礪廉隅

蔚為國器

朕實有厚望焉



臨雍儀注 乾隆五十年奏定

凡恭遇

臨雍。是日早。工部設更衣

御幄於

大成殿階下之東。南嚮。樂部和聲署設中和韶樂於

辟雍殿階下。設丹陛大樂於太學門內。設丹陛清樂於大樂東。武備院設

寶座鋪陳。鴻臚寺設經書案一於



寶座前。又設講案二於

寶座下。稍南。東西嚮。祭酒恭捧

御覽講章。陳於案上。書左經右。捧進講副本。陳書於

左案。陳經於右案。進講滿漢大學士二人在左

案西面。滿漢祭酒二人在右案東面。左翼王公

四人。衍聖公。內閣大學士。吏部。戶部。禮部。通政

使。司詹事府堂官。滿漢各一人。在進講大學士

後西面。右翼王公四人。兵部。刑部。工部。都察院

大理寺堂官。滿漢各一人。在進講祭酒後東面。

起居注官四人。在西南隅。亦東面。侍儀給事中御  
史各二人。在東西檐柱內。聽講各官在橋南甬  
道東西。六堂師生各序立堂階下。鴻臚寺鳴贊  
二人。立東西檐柱外。鳴贊二人。立階下。又鴻臚  
寺官四人。分立

辟雍橋南左右。鴻臚寺官四人。分立太學門外左  
右。皆東西面。屆時太常寺卿奏請

皇帝御禮服。乘輿出宮。

午門鳴鐘鼓。王以下文武各官於

東華門外。分翼排立。候。

駕過跪送。

法駕鹵簿前導。

駕出東華門。至成賢街。國子監祭酒司業率所屬官。

俱朝服。諸生俱公服。於街左跪迎。陪祀王公大。

臣百官俱朝服。先至大成門外祇候。隨。

駕入。

皇帝至更衣幄次。降輿。贊引官對引官恭導。候。

皇帝祭。

先師禮畢。

御彝倫堂。更袞服。各官咸更蟒袍補服。王公大學士以下各官。衍聖公率五經博士各氏後裔。祭酒司業率所屬官。及肄業諸生。各學教習進士舉人。貢生監生。官學生。均先至。

辟雍南。分東西班序立。

起居注官侍儀給事中御史各按位立。屆時禮部堂官奏請。

皇帝御辟雍。行講學禮。太學鳴鐘鼓。禮部堂官恭導。

前引後扈如儀。

皇帝御辟雍殿。

升寶座。中和韶樂作。奏盛平之章。對引禮部堂官前引大臣趨至前廊下立。侍衛於階下東西翼立。樂止。鳴贊官贊齊班。丹陛大樂作。奏慶平之章。鴻臚寺官分引王公衍聖公大學士以下各官。分東西班序立。肄業諸生各隨班末。聽鳴贊官贊行。二跪六叩禮畢。退。復原位立。樂止。鴻臚寺堂官二員。分引進講官四人。由南橋升階。鴻臚

寺官二員。分引王公衍聖公大學士九卿詹事  
由東西橋升階。俱入左右門。各就位立。鴻臚寺  
堂官退。就東西檐下立。

皇帝賜講官坐。講官就位。一叩坐。王公大臣咸按班  
立。鳴贊官贊進講。滿漢大學士以次進講四書。  
皇帝聞發書義。王公衍聖公大學士以下。及諸生跪  
聆畢。興。滿漢祭酒以次講經。

皇帝聞發經義。各官及諸生跪聆亦如之。畢。王公及  
各官諸生俱興。進講官退。就橋南。偕王公衍聖

國子監志

卷二十四

臨雍

五

公大學士以下各就拜位。北而立。丹陛大樂作。鳴贊。官贊跪叩興。行三跪九叩禮。以次退。樂止。滿漢進講大學士祭酒。及王公衍聖公大學士等。仍由左右門入。就位立。國子監司業以下各官師生。俱先至成賢街序立祇候。

御前進茶。丹陛清樂作。

皇帝賜進講各官。及王公衍聖公大學士九卿詹事茶。俱行一跪一叩禮坐。

賜茶畢。樂止。鴻臚寺堂官引王公大學士以下各官。

自左右門出。至橋南東西序立。禮部堂官奏禮成。中和韶樂作。奏道平之章。

皇帝起座。乘輿出太學門。樂止。祭酒司業率所屬官。暨進士舉人諸生跪送。候

駕過興。各官咸退。次日。衍聖公率五經博士各氏後裔。國子監祭酒率所屬官。恭進謝

恩表文。都察院派監禮御史二員。工部官備黃長案。黃緞桌套。鴻臚寺官設黃案於

午門外正中。是日黎明。衍聖公國子監祭酒各親



捧表文。鴻臚寺官引進。

長安左門至。

午門外。黃案前跪。置表於黃案上。行三跪九叩禮。復班聽贊。衍聖公率五經博士各氏後裔。國子監祭酒率所屬官及進士舉人諸生。行三跪九叩禮畢。禮部官收表文。送內閣收貯。是日。

賜衍聖公祭酒司業五經博士各氏後裔。及禮部太常寺光祿寺鴻臚寺各執事官燕於禮部。

謹案乾隆四十九年。

高宗純皇帝肇建辟雍工成五十年創舉  
臨雍之典特修

講學之儀。

簡命師儒。敷揚經訓。

親製

御論嘉惠士林。

闡前聖之精微。垂萬古之道訓。實為從來未有之盛典。

今謹遵會典恭載

臨雍儀注敬錄如右云。

國子監志

卷二十四

臨雍

書

○各衙門承辦

臨雍事宜

凡恭遇

皇帝臨雍。工部設更衣

御幄於

大成殿下階東。樂部和聲署設中和韶樂於

辟雍殿下。設丹陛大樂於太學門內。設丹陛清樂

於大樂東。武備院設

寶座鋪陳。鴻臚寺設

寶座前

御案。又設

寶座下講案。內閣先期奏定經書題。暨進呈

御論講義。與

視學同。并奏請

欽派滿漢大學士祭酒進講經書。是日王公百官咸

集

辟雍殿階下。其觀禮領班之行聖公等。及先期演  
習禮儀。亦與

視學同。

○國子監承辦

臨雍事宜

凡恭遇

臨雍先期移文禮部查取

臨雍典禮工部修葺

先師廟殿廡。

辟雍殿河橋及彝倫堂以下廳堂等處直省取官

廩生恩拔副歲優貢生援例貢監生內閣進擬

經書題恭請

欽定

南書房交出

御論。監臣撰擬講章。繕清漢文進呈

御覽。其收掌校刊裝潢。博士司之。並咨禮部奏請

欽派進講四書之滿漢大學士。進講經書之滿漢祭

酒。吏部兵部取在京廩生。及守部進士舉人暨

宗學官學算學六堂生徒。校錄謄錄。五經博士。

各氏後裔。傳知定期演禮。其查收職名入冊。典

籍司之。本監官及衍聖公謝表均撰擬繕寫正副本備進。屆期移文工部恭設更衣。

御幄樂部和聲署設中和韶樂大樂清樂武備院設寶座鋪陳。鴻臚寺設

御案講案祭酒恭捧

御覽講章陳於

御案左右。進講副本陳於講案左右。竝陳設

御案鎮紙牙籤講案亦如之。其鎮紙牙籤由翰林院

咨取派員恭請

高宗純皇帝御筆國學新建辟雍園水工成碑記冊。  
御筆上丁釋奠後臨新建辟雍講學得近體四首冊。

御筆仲春丁祭

至聖先師禮成述事冊。

御筆釋奠禮成御辟雍敬憶

皇祖詩句。因示皇子及諸大臣有作冊。

聖製表章經學之寶。鍍金寶。蘭亭硯。筆墨。筆筒。筆架。水

盂。陳設

御案上。



高宗純皇帝御筆玉刻蔣衡書十三經於辟雍序冊。

御筆石刻蔣衡書十三經於辟雍序冊。墨刻十三經全

部。陳設左右長案上。鸞翎扇。瑤瑯鹿。陳設

御座旁。瑤瑯香鑪。陳設

御座前。竝派員帶領聽講官生班次。

詳本志  
辟雍圖說恭蒞

皇帝升殿。進講大學士在左。祭酒在右。官生咸在王

公百官之末。其服色與

視學同。禮成。進講祭酒恭預

賜茶。司業率官生先赴成賢街。祇候送

駕。

御論刊本。由監進呈頒發。

謹案會典。乾隆三年以前。恭書

視學。五十年以後。恭書

臨雍。今遵照分載。謹識。

附

元

至正八年。夏四月乙亥。帝幸國子學。賜衍聖公  
銀印。升秩從二品。定弟子員出身。

元史順  
帝紀

明

永樂四年春三月辛卯釋奠於

先師曰禮不可簡必服皮弁行四拜禮御彝倫堂命

祭酒胡儼坐講尚書堯典司業張智坐講易泰

卦次日賜祭酒以下宴於奉天門監生宴於丹

墀賜儼智紵絲羅衣人二襲學官王峻用等三

十五人各紵絲衣一襲監生朱增等三千七十

四人鈔各五錠禮部請立視學之碑帝親製文

勒石

明太學志

正統九年。太學新成。春三月辛亥。釋奠於

先師孔子。命祭酒李時勉講。益稷帝庸作歌。與臯陶

賡歌一章。司業趙琬講。易文言。明日賜宴。賚如

例。御製重建太學碑文。勒石學宮。

同上

景泰二年。春二月辛未。釋奠於

先師孔子。遣陳懋于謙王直。陳循高穀江淵商輅劉

鉉分獻。命祭酒蕭鎡講。臯陶謨天聰明章。司業

趙琬講。泰卦象辭。翼日宴賚如例。加賜學官紗

帽帶。監生絹各一疋。是年遣官召衍聖公。并三

氏後裔赴京觀禮著為令同上

成化元年春三月丁巳釋奠於

先師孔子

明史憲宗紀

謹案明史本紀凡言釋奠皆視學也。又案禮志成化前視學之祭不設牲不奏樂。至是始用牲樂。且命衍聖公分獻。賜服與宴。並及三氏後裔。宏治元年春三月丁卯釋奠於

先師孔子。詔定先期致齋一日。奠加幣。用太牢。禮畢。御彝倫堂。命祭酒費閏坐講說。命惟天聰明節。

司業劉震講乾卦大人與天地合德一節。明日

宴賚如例。

明太學志

正德元年春三月甲申。親視學釋奠。同上

嘉靖元年春三月甲寅。釋奠於

先師孔子。遂視學。命祭酒趙永講禹謨允若茲章。司

業吳惠講乾卦時乘六龍節。翼日。賜賚如制。行

聖公率三氏後裔。祭酒率學官諸生。上表謝恩。

皆賜宴於禮部。是年。命衍聖公及顏孟博士孔

氏老成者五人。顏孟各二人。赴京陪祀。同上

十二年春三月丙辰釋奠於

先師孔子。命大臣致奠

啓聖公祠。遂視學。命祭酒林文俊講益稷篇元首

明哉節。司業馬汝驥講頤卦象辭。諭諸生端本

尚實。勿徒事詞章。同上

隆慶元年秋八月癸未朔。釋奠於

先師孔子。命吏部侍郎錄監事趙貞吉講禹謨后克

艱節。司業萬浩講乾卦大象。賜衍聖公祭酒司

業等宴禮部。免簪花作樂。餘如例。同上

謹案是年。朝鮮陪臣李榮賢等六人。各具本等衣冠。赴奠倫堂外觀禮。廷議班列文臣之後。

萬曆四年。秋八月壬戌。上親釋奠。是日雨甚。免講。次日賜賚如例。同上

天啓五年。春三月甲寅。親視學釋奠。同上

崇禎二年。春正月丙子。釋奠於

先師孔子。

明史莊烈帝紀

○視學儀附

洪武十五年定制。前期設御幄於大成門東。南



嚮設御座於彝倫堂。至日，學官率諸生迎駕於成賢街左。帝入御幄，具皮弁服，詣

先師神位，再拜，獻爵，復再拜。四配十哲兩廡分獻如常儀。帝入御幄，易常服，升輿至彝倫堂升座。學官諸生五拜叩頭。東西序立於堂下。三品以上及侍從官以次入堂。東西序立。贊進講祭酒司業博士助教四人由西門入。至堂中，贊舉經業於御前。禮部官奏請授經於講官。祭酒跪受賜講官坐。乃以經置講案，叩頭就西南隅几榻坐。

講。賜大臣翰林儒臣坐。皆叩頭序坐於東西。諸生圍立以聽。講畢。叩頭退就本位。司業博士助教各以次進講。出堂門。復位。贊宣制。學官諸生列班。俱北面跪聽宣諭。五拜叩頭。禮畢。學官諸生出成賢街送駕。明日祭酒率學官上表謝恩。永樂四年。仍行四拜禮。講畢。賜百官茶。祭酒等表謝。帝御奉天門。賜百官宴。仍賜祭酒司業紵絲羅衣二襲。學官各紵絲衣一襲。諸生各鈔五錠。正統九年。幸國子監如儀。禮畢。賜公侯伯駙

馬武官都督以上。文官三品以上及翰林學士  
至檢討。國子監祭酒至學錄宴。先是視學祭  
先師。不設牲。不奏樂。至成化元年。始用牲樂。視學之  
日。樂設而不作。禮畢。百官慶賀。賜衣服宴。皆及  
孔顏孟三氏子孫。宏治元年。定先期致齋一日。  
奠加幣。牲用太牢。改分獻官為分奠官。嘉靖元  
年。定衍聖公率三氏子孫。祭酒率學官諸生上  
表謝恩。皆賜宴於禮部。十二年以  
先師祀典既正。再視學。命大臣致奠。

啓聖公祠。萬厯四年。定次日行慶賀禮。頒賞如舊。  
免賜宴。初憲宗取三氏子孫赴京觀禮。又命衍  
聖公分獻。至世宗命衍聖公及顏孟二博士。孔  
氏老成者五人。顏孟各二人。赴京陪祀。明史  
禮志